

四庫全書

集部

欽定四庫全書

萬首唐人絕句卷七

宋 洪邁 編

五言

嵩山夜還

宋之問

家住嵩山下好采舊山薇
自省遊泉石何曾不夜歸
湖上別鑒上人

願與道林近在意逍遙
篇自有靈佳寺何用沃洲禪

題鑒上人房二首

落花雙樹積芳草一庭春玩之堪興異何必見幽人
晚入應真理經行尚未回房中無俗物林下有青苔

途中寒食

馬上逢寒食途中屬暮春可憐江浦望不見洛橋人

荅田徵君

出遊杳何處遲回伊洛間歸寢忽成夢宛在嵩丘山

詠史

高適

尚有綈袍贈應憐范叔寒不知天下士猶作布衣看

田家春望

出門何所見春色滿平蕪可歎無知己高陽一酒徒

閒居

柳色驚心事春風厭索居方知一杯酒猶勝百家書

送兵至薊北

積雪與天迴屯兵連塞愁誰知此行邁不為覓封侯

封丘作

州縣才難適雲山道欲窮揣摩慚黠吏棲隱謝愚公

題張處士菜園

耕地桑柘間地肥菜常熟為問葵藿資何如廟堂肉

石宮四詠

元結

石宮春雪白白雪宜蒼苔拂雪踐石徑俗士誰能來

石宮夏水寒寒水宜高林遠風吹蘿蔓野客熙清陰

石宮秋氣清清氣宜山谷落葉逐霜風幽人愛松竹

石宮冬日暖暖日宜溫泉晨光靜水霧逸者猶安眠

將牛何處去二首

叔間叟甥
直者長子

將牛何處去耕破故城東
相伴有田父相歡惟牧童
將牛何處去耕破西陽城
叔間修農具直者伴我耕

將船何處去二首

叔靜叟甥
正者次子

將船何處去釣彼大回中
叔靜能鼓撓正者隨弱翁
將船何處去送客小回南
有時逢惡客還家亦少酣

效何水部二首

韋應物

玉宇合清露香籠散輕烟
應當結沈抱難從茲夕眠

夕漏起遙怨蟲響亂秋陰反覆相思字中有故人心

期元侍御不至二首

庭樹忽已暗故人那不來祇應厭煩暑永日坐霜臺
官榮多所繫閒居亦愆期高閣猶相望青山欲暮時

澧上醉題

芳園知夕燕西郊已獨還誰言不同賞俱是醉花間

西郊

山高鳴過雨澗樹落殘花非闕春不待當由期自賒

對月寄孔諫議

思懷在雲闕，泊素守中林。
出處雖殊跡，明月兩知心。

贈李儋

風光山郡少，來看廣陵春。
殘花猶待客，莫問意中人。

寄釋子良史酒

秋山僧冷病，聊寄五三杯。
應瀉山瓢裏，還寄此瓢來。

上皇三臺

不寐倦長更，披衣出戶行。
月寒秋竹冷，風切夜窗聲。

襄子卧病

念子抱沉疾，霜露變滌城。獨此高牕下，自然無世情。

寄璨師

林院生夜色，西廊上紗燈。時憶長松下，獨坐一山僧。

寄盧陟

柳葉遍寒塘，曉霜凝高閣。累日此留連，別來成寂寞。

宿永陽寄璨師

遙知郡齋夜，凍雪封松竹。時有山僧來，懸燈獨自宿。

雪行

浙滙覆寒騎飄颻暗川容行子郡城曉披雲看杉松

秋夜寄丘員外

懷君屬秋夜散步詠涼天山空松子落幽人應未眠

入西齋示僧

僧齋地雖密忘子跡要賒一來非問訊自是看山花

贈丘員外

跡與孤雲遠心將野鶴俱那同石氏子每到府門趨

贈舊識

少年遊太學負氣蔑諸生
蹉跎三十載今日海隅行

寄淮上綦母三

請去聲
作音佐

滿城憐傲吏終日賦新詩
請報淮陰客春帆浪作期

送房杭州

專城未四十暫謫宣
蹉跎風雨吳門夜惻愴別情多

聽江笛送陸侍御

遠聽江上笛臨觴一送君
還愁獨宿夜更向郡齋聞

答賓

斜月纔鑿帷凝霜偏冷枕持情須耿耿故作單牀寢

送丘員外歸山居

郡閣始嘉宴青山憶舊居為君量革履且願住籃輿

答崔都水

深夜竹庭雪孤燈案上書不遇無為化誰復得閒居

酬令狐司錄善福精舍見贈

野寺望山雪空齋對竹林我以養愚地生君道者心

答趙氏生

暫與雲林別，忽陪鴛鴦翔。看山不得去，知爾獨相望。

答王卿送別

去馬嘶春草，歸人立夕陽。元知數日別，要使兩情傷。

懷琅邪二釋子

白雲埋大壑，陰崖滴夜泉。應居西石室，月照山蒼然。

話舊

存亡三十載，事過悉成空。不惜霑衣淚，併話一宵中。

閭門懷古

獨鳥下高樹
遙知吳苑園
淒涼千古事
日暮倚閭門

登樓

茲樓日登眺
流歲暗蹉跎
坐厭淮陰守
秋山紅樹多

善福寺閣

殘霞照高閣
清山出遠林
晴明一登望
瀟灑此幽襟

寒食後北樓作

園林過新節
風花亂高閣
遙聞擊鼓聲
蹴踘軍中樂

西樓

高閣一長望故園何日歸
烟塵擁函谷秋雁過來稀

夜望

南樓夜已寂暗鳥動林間
不見城郭事沈沈唯四山

晚登郡閣

悵然高閣望已掩東城關
春風偏送柳夜景欲沈山

詠玉

乾坤有精物至寶無文章
雕琢為世器真性一朝傷

詠露珠

秋行一滴露清夜墜玄天將來玉盤上不定始知圓

詠水精

映物隨顏色含情無表裏持來向明月的皜愁成水

詠珊瑚

絳樹無花葉非石亦非瓊世人何處得蓬萊石上生

詠琉璃

有色同寒冰無物隔纖塵象筵看不見堪將對玉人

詠琥珀

曾為老茯神本是寒松液
蚊蚋落其中千年猶可覩

詠曉

軍中始吹角城上河初落
深沈猶隱帷晃朗先分闕

詠夜

明從何處去暗從何處來
但覺年年老半是此中催

詠聲

萬物自生聽大空恒寂寥
還從靜中起却向靜中消

野居書情

世事日可見身名良蹉跎尚瞻白雲嶺聊作負薪歌

郡齋卧疾

香爐宿火滅蘭燈宵影微秋齋獨卧病誰與覆寒衣

秋齋獨宿

山月皎如燭風霜時動竹夜半鳥驚栖窗間人獨宿

秋夜

高閣漸凝露涼葉稍飄闡憶在南宮直夜長鐘漏稀

詠春雪

徘徊輕雪意似惜艷陽時不悟風花冷翻令梅柳遲

對殘燈

獨照碧牕久欲隨寒燼滅幽人將遽眠解帶翻成結

紫荆花

雜英紛已積含芳獨暮春還如故園樹忽憶故園人

翫螢火

時節變衰草物色近新秋度月影繞斂繞竹光復流

移海榴

葉有苦寒色山中霜霰多雖此蒙陽景移根意若何

題桐葉

參差剪綠綺瀟灑覆瓊柯憶在灋東寺偏書此葉多

池上

郡中卧病久池上一來賒榆柳飄枯葉風雨倒橫查

西塞山

勢從千里奔直入江中斷嵐橫秋塞雄地束驚流滿

夜聞獨鳥啼

失侶度山覓投林舍北啼今將獨夜意偏知對影栖

聞雁

故園眇何處歸思方悠哉淮南秋雨夜高齋聞雁來

竹裏逕

司空文明

幽逕行跡稀清陰苔色古蕭蕭風欲來乍似蓬山雨

黃子陂

岸芳春色曉水影夕陽微寂寂深烟裏漁舟夜不歸

田鶴

散下渚田中隱見菰蒲裏哀鳴自相應欲作凌風起

藥園

春園芳已遍綠蔓雜紅英獨有深山客時來辨藥名

石井

苔色遍春石桐陰入寒井幽人獨汲時先樂殘陽影

板橋

橫遮野水石前帶荒村道來往見愁人清風柳陰好

石蓮花

今逢石上生本自波中有紅艷秋風裏誰憐衆芳後

遠寺鐘

杳杳疎鐘發月風清復引中宵獨聽之似與東林近

松下雪

不隨晴野盡獨向深松積落照入寒光偏能伴幽寂

新柳

全欺芳蕙晚似妒寒梅疾撩亂發青條春風來幾日

唐昌公主院看花

遺殿空長閉，乘鸞自不回。至今荒草上，寥落舊花開。

別張讚

今日山晴後，殘蟬菊發時。發樓見秋色，何處最相思。

晚思

蛩餘窗下月，草溼階前露。晚景淒我衣，秋風入何樹。

留盧秦卿

知有前期在，難分此夜中。無將故人酒，不及石尤風。

金陵懷古

輦路江楓暗宮朝野草春傷心庾開府老作北朝臣

哭麴山人

憶昔秋風起君曾歎逐臣何言芳草日自作九泉人

下第

趙嘏

南溪抱瓮客失意自懷羞晚路誰攜手殘春自白頭

到家

童稚苦相問歸來何太遲共誰爭歲月贏得鬢邊絲

春釀

春釀正風流
梨花莫問愁
馬卿思一醉
不惜鷓鴣裘

寒塘

曉髮梳臨水
寒塘坐見秋
鄉心正無限
一雁度南樓



萬首唐人絕句卷七

欽定四庫全書

集部

萬首唐人絕句卷

八至十五

詳校官庶吉士臣柳邁祖

助教臣常循覆甚

總校官編修臣王燕緒

校對官編修臣勵守謙

謄錄監生臣何大士

欽定四庫全書

萬首唐人絕句卷八

宋 洪邁 編

五言

夜還東溪

王績

石苔應可踐
叢枝幸易攀
青溪歸路直
乘月夜歌還

山中別李處士

為向東溪道人來
路漸賒
山中春酒熟
何處得停家

初春

春來日漸長醉客喜年光稍覺池亭好偏聞酒甕香

醉後

阮籍醒時少陶潛醉日多百年何足度乘興且長歌

題酒店壁

昨夜餅始盡今朝甕即開夢中占夢罷還向酒家來

戲題卜鋪壁

旦逐劉伶去宵隨畢卓眠不應長賣卜須得杖頭錢

嘗春酒

野鷗浮鄭酌山酒澆陶巾但令千日醉何惜兩三春

獨酌

在生知幾日無狀逐空名不如多釀酒時向竹林傾

秋夜喜遇王處士

北場芸霍罷東臯刈黍歸相逢秋月滿更值夜螢飛

山夜調琴

促軫乘明月抽絃對白雲從來山水韻不使俗人聞

看釀酒

六月調神麴正朝汲美泉從來作春酒未省不經年

入長安詠秋蓬示辛學士

遇坎聊知止逢風或未歸孤根何處斷輕葉強能飛

辛答

託根雖異所飄葉早相依因風若有便更共入雲飛

題酒店壁五首

洛陽無大宅長安乏主人黃金消未盡祇為酒家貧

竹葉連槽翠蒲桃帶翻紅相逢不令盡別後為誰空
對酒但知飲逢人莫強牽倚壚便得睡橫甃足堪眠
此日長昏飲非關養性靈眼看人盡醉何忍獨為醒
有客須交飲無錢可別酤來時長道貫慚愧酒家壺

他鄉敘興

王勃

綴葉歸烟晚乘花落照春邊城琴酒處俱是越鄉人

夜興

野烟含夕渚山月照秋林還將中散興來偶步兵琴

臨江二首

汎汎東流水飛飛北上塵歸驂將別棹俱是倦游人
去驂嘶別路歸櫂隱孤舟江皋木葉下應想故城秋

江亭夜月送別二首

江送巴南水山橫塞北雲津亭秋月夜誰見泣離羣
亂烟籠碧砌飛月向南端寂寂離亭掩江山此夜寒

別人四首

久客逢餘閨他鄉別故人自然堪下淚誰忍望征塵

江上風烟積山幽雲霧多送君南浦外還望將如何
桂條雖不駐蘭筵幸未開林塘風月賞應待故人來
霜華淨天末霧色籠江際客子常畏人何為久留滯

贈李十四四首

野客思茅宇山人愛竹林琴樽唯待處風月自相尋
小徑偏宜草空庭不厭花平生誰與酒自得會仙家
亂竹開三徑飛花滿四鄰從來楊子宅別有尚玄人
風筵調桂軫月徑引藤杯直當花院裏書齋望曉開

早春野望

江曠春潮白山長曉岫青他鄉臨睨極花柳映邊亭

山中

長江悲已滯萬里念將歸況復高風晚山山黃葉飛

冬郊行望

桂密巖花白梨疎林葉紅江臯寒望盡歸念斷征蓬

寒夜思友三首

久別侵懷抱他鄉變容色月夜調鳴琴相思此何極

雲間征思斷月下歸愁切鴻雁西南飛如何故人別
朝朝翠山下夜夜蒼江曲復此遙相思清樽湛芳潔

始平曉息

觀闕長安近江山蜀路賒客行朝復夕無處是鄉家

扶風晝屈離京浸遠

帝里金莖去扶風石柱來山川殊未已行路方悠哉

普安建陰題壁

江漢深無極梁岷不可攀山川雲霧裏遊子何時還

曲江池

盧照鄰

浮香繞曲岸，圓影覆華池。
常恐秋風早，飄零君不知。

臨階竹

封霜連錦砌，防露拂瑤階。
聊將儀鳳質，暫與俗人諧。

含風蟬

高情臨爽月，急響送秋風。
獨有危冠意，還將衰鬢同。

浴浪鳥

獨舞依磐石，羣飛動輕浪。
奮迅碧沙前，長懷白雲上。

葭川獨泛

倚櫂春江上橫舟石岸前山暝行人斷迢迢獨泛仙

送元兄入蜀

關山客子路花柳帝王城北中一分手相顧憐無聲

宿玄武

方池開曉色圓月下秋陰已乘千里興還撫一絃琴

二

庭搖北風柳院繞南飛禽累宿恩方重窮秋歎不深

九隴津集

落落樹陰紫澄澄水華碧復有翻飛禽徘徊疑曳鳥

登玉清

絕頂橫臨日孤峯半倚天徘徊拜真老萬里見風烟

遊昌化山精舍

寶地乘峰出香臺接漢高稍覺真途近方知人事勞

詠照

駱賓王

寫月無芳桂照月有花菱不持光謝水翻將影學冰

在軍登城樓

城下風威冷江中水氣寒戎衣何日定歌舞入長安

易水送人

此地別燕丹壯士髮衝冠昔時人已沒今日水猶寒

挑燈杖

稟質非貪熱焦心豈憚熬終知不自潤何處用脂膏

詠塵

凌波起羅襪含風染素衣別有知音調聞歌應自飛

翫初月

忌滿光恒缺乘昏影漸流自能明似鏡何用曲如鉤

和聖製函谷關

張九齡

函谷雖云險黃河復已清聖心無所隔空此置關城

又渡潼關

隱嶙故城壘荒涼空戍樓在德不在險方知王道休

荅靳博士

上苑春先入中園花盡開唯餘幽徑草尚待日光催

照鏡見白髮

宿昔青雲志蹉跎白髮年誰知明鏡裏形影自相憐

自君之出矣

自君之出矣不復理殘機思君如滿月夜夜減清輝

貴公子夜闌曲

李賀

裊裊沈水烟烏啼夜闌景曲沼芙蓉波腰圍白玉冷

馬詩十六首

龍脊貼連錢銀蹄白踏烟無人識錦韉誰為鑄金鞭

忽憶周天子驅車上玉山
鳴騶辭鳳苑赤驥最承恩
大漠沙如雪燕山月似鉤
何當金絡腦惱走踏青秋
西母酒將闌東王飯已乾
君王若燕去誰為拽車轅
赤兔無人用當須呂布騎
吾聞果下馬羈策任蠻兒
騶叔死忽忽如今不豢龍
夜來霜壓棧駮骨析西風
內馬賜官人銀鞵刺騏驎
年時鹽坂上蹭蹬溘風塵
批竹初攢耳桃花未上身
他時須攪陣牽去借將軍
寶玦誰家子長聞俠骨香
堆金買駮骨將送楚襄王

香襍赭羅新盤龍感銓鱗回看南陌上誰道不逢春
不從桓公獵何能伏虎威一朝溝隴出看取拂雲飛
白鐵剄青禾礎間落細莎世人憐小頸金埒畏長牙
伯樂向前看旋毛生腹間祇今培白草何日驀青山
蕭寺馱經馬元從竺國來空知有善相不解走章臺
汗血到王家隨鑿越玉珂少君騎海上人見是青驪
武帝愛神仙燒金得紫烟殿中皆肉馬不解上青天

昌谷讀書示巴童

蟲響燈光薄，宵寒藥氣濃。
君憐垂翅客，辛苦尚相從。

巴童答

巨鼻宜山褐，龐眉入苦吟。
非君唱樂府，誰識怨秋深。

代崔家送客

行蓋柳烟下，馬蹄白翩翩。
恐送行處盡，何忍重揚鞭。

莫種樹

園中莫種樹，種樹四時愁。
獨睡南牀月，今秋似去秋。

將發

東牀卷席罷，
落將行去秋。
白遙遙空日，
滿門前路。
塘上行

藕花涼露溼，
花缺藕根澀。
飛下雌鴛鴦，
塘水聲溘溘。
京城

驅馬出門意，
牢落長安心。
兩事誰向道，
自作秋風吟。
玉真公主山居
儲光羲

山北天泉苑，
山西鳳女家。
不言沁園好，
獨隱武陵花。
遊湖

竹吹留歌扇蓮香入舞衣前溪多曲淑乘興莫先歸

長安道二首

西行一千里暝色生寒樹暗聞歌吹聲知是長安路
鳴鞭過酒肆袷服遊倡門百萬一時盡含情無片言

洛陽道五首

洛水春冰開洛城春樹綠朝看大道上落花亂馬足
大道直如髮春日佳氣多五陵貴公子雙雙鳴玉珂
春風二月時道旁柳堪把上枝覆宮閣下枝拂車馬

劇孟不知名，千金買寶劍。出入平津邸，自言嬌且艷。
浴水照千門，千門碧空裏。少年不得志，走馬遊新市。

江南曲四首

綠江深見底，高浪直翻空。慣是湖邊住，舟輕不畏風。
逐流牽荇葉，沿岸摘蘆苗。為惜鴛鴦鳥，輕輕動畫橈。
日暮長江裏，相邀歸渡頭。落花如有意，來去逐船流。
隔江看樹色，沿月聽歌聲。不是長干住，那從此路行。

萬首唐人絕句卷八

欽定四庫全書

萬首唐人絕句卷九

宋 洪邁 編

五言

贈李唐山人

戴叔倫

此意無所欲閉門風景遲
柳條將白髮相對共垂絲

題秦隱君麗句亭

北人歸欲盡猶自住蕭山
閉戶不曾出詩名滿世間

答孫常州見憶

畫鷁春風裏
超遙去若飛
那能寄相憶
不並子猷歸

送裴明州效南朝體

湘水連湘水
千波萬浪中
知郎未得去
慚愧石尤風

戲留顧明府

江明雨初歇
山暗雲猶溼
未可動歸橈
前程風浪急

答崔載華

文案日成堆
愁眉拽不開
偷歸甕間卧
逢箇楚狂來

將赴行營勸客同醉

絲管霜天夜烟塵淮水西明朝上征去相伴醉如泥

夏夜江樓會別

不作十日別煩君此相留兩餘江上月好醉竹間樓

歲除日追赴撫州辨對留別崔法曹

上國杳未到流年忽復新回車不自識君定送何人

江館會別

離亭一會宿能有幾人同莫以回車泣前途不盡窮

容州回逢陸三別

西南積水遠老病喜生歸此地故人別空餘淚滿衣

古意寄呈二侍郎

夜光貯懷袖待報一顧恩日向江湖老此心誰為論

送李大夫渡口阻風

浪息定何時龍門到恐遲輕舟不敢渡空立望旌旗

過三閭廟

沅湘流不盡屈宋怨何深日暮秋烟起蕭蕭楓樹林

泊湘口

湘山千嶺樹桂水九秋波
露重猿聲絕風清月色多

赴撫州對奉酬崔法曹

謗議不自辨親朋那得知
雨中驅馬去非是獨傷離

遊道林寺

佳山路不遠俗侶到常稀
及此烟霞暮相看復欲歸

後宮曲

初入長門宮謂言君戲妾
寧知秋風至吹盡庭前葉

新別離

手把杏花枝未曾經別離
黃昏掩關後寂寞心自知

昭君詞

漢宮若遠近路在寒沙上
列死不得歸何人共南望

勸陸三飲酒

寒郊好天氣勸酒莫辭頻
擾擾鍾陵市何窮不醉人

關山月

月出照關山秋風人未還
清光無遠近鄉淚半書間

其二

一雁過連營
繁霜覆古城
悲笳在何處
半夜起邊聲

寄外兄

盧仝

何處堪惆悵
情親不得親
興寧樓上月
辜負酒家春

守歲

老來經節臘
樂事甚悠悠
不及兒童日
都盧不解愁

新月

仙宮雲箔卷
露出玉簾鈎
清光無所贈
相憶鳳凰樓

解悶

人生都幾日一半是離憂
但有樽中物從他萬事休

憶酒寄劉侍郎

愛酒如偷蜜憎醒似見刀
君為麴蘖主酒醒莫辭勞

新蟬

泉溜潛幽咽琴鳴乍往還
長風剪不斷還在樹枝間

村醉

村醉黃昏歸健倒三四五
摩娑莓苔背噴我驚爾不

石讓竹

自顧掇不轉何敢當主人竹弟有清風可以娛嘉賓

竹答石

竹弟謝石兄清風非所任隨分有蕭瑟實無堅重心

酬徐公以新文見招

昨夜霜明月果有清音生便與走相和愁聞寒玉聲

夜半步次古城

楊衡

茫茫行復坐惟有古時城夜半無烏雀花枝當月明

邊思

蘇武節旄盡李陵音信稀
花當隴上發人向隴頭歸

題花樹

都無看花意偶到樹邊來
可憐枝上色一一為愁開

宿吉祥寺寄廬山隱者

鳳鳴雲外鐘鶴宿千年松
相思杳不見月出山重重

老恨

劉又

風打杉雪殘補書書不完
懶學渭上翁辛苦把竹竿

獨飲

盡飲調羹自古無好手所以山中人兀兀但飲酒

贈姚秀才小劍

一條萬古水向我手心流臨行瀉贈君勿蕩細碎鑿

嘲荆卿

白虹千里氣頸血一劍義報恩不到頭徒作輕生事

與孟東野

寒衣草木皮饑食草木根不為孟夫子豈識市井門

愛碣石山

碣石何青青挽我雙眼睛愛爾多古峭不到山間行

代牛言

渴飲潁川水餓喘吳門月黃金如可種我力終不歇

餓詠

文王久不出賢士如土賤妻孥從餓死敢愛黃金篆

和韋開州宿雲寺

張籍

清淨當深處虛明向遠開卷簾無俗客應只見雲來

桃塢

春塢桃花發多將野客遊日西殊未厭看望酒缸頭

竹巖

獨入千竿裏緣巖踏石層笋頭齋欲出更不許人登

胡蘆沼

曲沼春流滿新蒲映野鵝閒齋朝飯後拄杖遶行多

隱月岫

月出深峯裏清涼夏亦寒每嫌西落疾不得到明看

琵琶臺

臺上綠蘿春閒登不待人每當休暇日著履戴絃巾

梅溪

自愛新梅好行尋一徑斜不教人掃石恐掃落來花

繡衣石榻

山城無別味藥草兼魚果時到繡衣人同來石上坐

茶嶺

紫芽連白蘂初向嶺頭生自看家人摘尋常觸露行

上士泉餅

階上一眼泉四邊青石甃
唯有護淨僧添餅將盥漱

流杯渠

淥酒白螺杯隨流去復回
似知人把處各向面前來

盤石磴

壘石盤空遠層層勢不危
不知行幾匝得到上頭時

寄西峯僧

松暗水涓涓夜涼人未眠
西峯月猶在遙憶草堂前

禪師

獨在西峯頂年年閉石房家中無子弟人到為焚香

送遠客

憔悴遠歸客殷勤欲別杯九星壇下露幾日見重來

題暉禪師影堂

早日欲參禪竟無相識緣道場今獨到惆悵影堂前

惜花

山中春已晚處處見花稀明日來無盡林間宿不歸

涇州塞

行到涇州塞唯聞差戍聲
道邊雙古塚猶記向安西

岸花

可憐岸邊樹紅藥發青條
東風吹度水衝著木蘭橈

別子鵠

離燈及晨輝行人起復思
出門兩相顧青山路逶迤

野中

暮暮野田草草中牛羊道
古墓無子孫白楊不得老

和舍弟恭惜花

呂溫

去歲無花看今年未看花更聞飄落盡走馬向誰家

浴後贈主人

新浴振輕衣滿堂寒月色主人有美酒況是曾相識

吐蕃館月夜

三五窮荒月還應照北堂回身向暗卧不忍見圓光

題梁宣帝陵二首

即讐終自翦覆國豈為雄假號孤城裏何如在甬東

祀夏功何薄尊周義不成淒涼庾信賦千載共傷情

雪中送楊七

愁雲重拂地飛雪亂遙程莫慮前山暗歸人眼自明

衡州早春二首

碧水何逶迤東風吹沙草烟波千萬曲不辨萬河道
病肺不飲酒傷心不看花唯驚望鄉處猶自隔長沙

書懷寄劉連州

朱邑何為者桐鄉有古祠我心常所慕二郡老人知

偶作二首

栖栖復汲汲，忽覺年四十。今朝滿衣淚，不是傷春泣。
中夜兀然坐，無言空涕洟。丈夫志氣事兒女，安得知。

聽籠中山鵲

掩抑沖天意，悽愴觸籠音。驚曉一聞處，傷春千里心。
秋夜

夜久葉露滴，秋蟲入戶飛。卧多骨髓冷，起覆舊綿衣。

南澗

野桂香滿溪石沙寒覆水愛此南澗頭一日潺潺裏

題柏巖禪師影堂

山中磚塔閉松下影堂新恨不生前識今朝禮畫身

送人

河亭收酒器語盡各西東回首不相見行車秋雨中

春意二首

去日丁寧別情知寒食歸緣逢好天氣教熨看花衣
誰是杏園主一枝臨古歧從傷早春意乞取欲開枝

早發汝南

橋上車馬發橋南烟樹開青山斜不斷迢遞故鄉來

夜聞子規

子規啼不歇到曉口應穿況是不眠夜聲聲在耳邊

四望驛松

當初北澗別直至此亭中何意聞鞞耳聽君枝上風

江館

水面細風生菱歌慢慢聲客亭臨小市燈火夜妝明

題江臺驛

水北金臺路年年行客稀
近聞天子使多取雁門歸

贈謫者

何罪過長沙年年北望家
重封嶺頭信一樹海邊花

酬從姪借詩本

眼暗沒工夫慵來剪客鬚
自看花樣古稱得少年無

新嫁娘詞三首

鄰家人不識牀上坐堆堆
郎來傍門戶滿口索錢財

錦帳兩邊橫，遮掩待娘行。
遣郎鋪簾席，相並拜親情。
三日入廚裏，洗手作羹湯。
未諳姑食性，先遣小姑嘗。

聞瀑布冰折

馬戴

萬仞冰梢折，寒聲投白雲。
光搖山月墮，我向石林聞。

過亡友墓

憶昨送君塋，今看墳樹高。
尋思後期者，只是益生勞。

白鹿原晚望

漣曲雁飛下，秦原人葬回。
丘墳與城闕，草樹共塵埃。

秋思二首

萬木秋霖後孤山夕照餘
田園無歲計寒近憶樵漁
亭樹霜霰滿野塘鳧雁多
蕙蘭不可折楚老徒悲歌

萬神谷紀事

霹靂振秋岳折松橫洞門雲龍忽變化但覺玉潭昏

萬首唐人絕句卷九

欽定四庫全書

萬首唐人絕句卷十

宋 洪邁 編

五言

應制奉和潼關

張說

天德平無外關門東復西不將千里隔何用一丸泥

奉裴中書酒

西掖恩華降南宮命席關詎知雞樹後更接鳳池歡

被使在蜀

即今三伏盡尚自客臨邛歸途千里外秋月定相逢

正朝摘梅

蜀地寒猶暖正朝發早梅偏驚萬里客已復半年來

蜀道後期

客心爭日月來往預期程秋風不相待先至洛陽城

廣州江中作

去國歲方晏愁心轉不堪離人與江水終日向西南

江中遇客

危石江中起孤雲嶺上還相逢皆得意何處是鄉關

守歲三首

故歲今宵盡新年明旦來愁心隨斗柄東北望春回
夜風吹醉舞庭戶對酣歌愁逐前年少歡迎今歲多
桃枝堪辟惡竹爆好驚眠歌舞留今夜猶言惜舊年

岳州看黃葉

白首看黃葉徂顏復幾何空慚棠樹下未有政成歌

耗磨日飲

上月今朝減流傳耗磨辰
還將不事事同醉俗中人

九日遊茱萸山三首

家居洛陽下舉目見高山
刻作茱萸節情生造化間
菊酒攜山客萸囊繫牧童
路疑隨大塊心似問鴻濛
晚節歡重九高山上五千
醉中知偶聖夢裏見尋仙

傷妓人董氏四首

董氏嬌饒性多為窈窕
名人隨秋月落韻入擣衣聲

粉藥粘妝籠金花唱翠條夜臺無戲伴魂影向誰嬌
舊亭紅粉閣宿處白雲關春日雙飛去秋風獨不還
舞席沾殘粉歌梁委舊塵獨傷牕裏月不見帳中人

惜花

施肩吾

落盡萬株紅無人解繫風今朝芳徑裏惆悵錦機空

衝夜行

夜行無月時古路多荒榛山鬼遙把火自照不照人

夜愁曲

歌者歌未絕愁人愁轉增空把琅玕枝強挑無心燈

雜古詞五首

可憐江北女慣唱江南曲搖蕩木蘭舟雙鳧不成浴
郎為匕上香妾作籠下灰歸時即暖熱去罷生塵埃
夜裁鴛鴦綺朝織蒲桃綾欲試一寸心待逢三尺冰
憐時魚得水怨罷商與參不如山梔子却能結同心
紅顏感暮花白日同流水思君若孤燈一夜一心死

幼女詞

幼女纔六歲未知巧與拙向夜在堂前學人拜新月

買地詞

買地不惜錢為多芳桂叢所期在清涼坐起聞香風

弋陽訪古

行逢葛溪水不見葛仙人空拋青竹杖呪作葛陂神

幽居樂

萬籟不在耳寂寥心境清無妨數莖竹時有蕭蕭聲

湘川懷古

湘水終日流湘妃昔時哭美色已成塵淚痕猶在竹

秋山吟

夜吟秋山上嫋嫋秋風歸月色清且冷桂香落人衣

寒衣

三復招隱吟不知寒夜深看看西來月移到青天心

湘竹詞

萬古湘江竹無窮奈怨何年年長春筍只是淚痕多

觀花後遊慈恩寺

世事知難了，應須問苦空。羞將看花眼，來入梵王宮。

乞巧詞

乞巧望星河，雙雙並綺羅。不嫌針眼小，只道月明多。
不見來詞

烏鵲語千回，黃昏不見來。漫教脂粉匣，閑了又重開。
夜起來

香銷連理帶，塵覆合歡杯。懶卧相思枕，愁吟夜起來。

笑卿卿詞

笑向卿卿道。耽書夜夜多。出來看玉兔。又欲過銀河。

感遇詞

一種貌如仙人情。要自偏羅敷。有底好。最得使君憐。

及第後夜訪月仙子

自喜尋幽夜。新當及第年。還將天上桂。來訪月中仙。

定情樂

敢嗟君不憐。自是命不諧。著破三條裙。却還雙股釵。

其二

感郎雙條脫新破八幅綃不惜榆莢錢買人金步搖

宿南一上人山房

牕牖月色多坐卧禪心靜青鬼來試人夜深弄燈影

蘭渚泊

家在洞水西身作蘭渚客天晝無纖雲獨坐空江碧

經吳真君舊宅

古仙煉丹處不測何歲年至今空宅基時有五色烟

古相思

十訪九不見甚於菖蒲花可憐雲中月今夜墮我家

瀑布

豁開青冥顛寫出萬丈泉如裁一條素白日懸秋天

秋洞宿

夜深秋洞裏風雨報龍歸何事觸人睡不教蝴蝶飛

醉後

權德輿

美祿與賢人相逢自可親願將花柳月盡賞醉鄉春

和邵端公

莫羨簷前柳春風獨蚤歸陽和次第發桃李更苦菲
李韶州書論釋氏州有能公遺跡詩以問之
常日區中暇時聞象外言曹溪有宗旨一為勘心源

嶺上逢久別者又別

十年曾一別征路此相逢馬首向何處夕陽千萬峯

敷水驛

空見水名敷秦樓昔事無臨風駐征驛聊復捋髭鬚

次滕老莊

征途無旅館當晝喜逢君羸病仍留客朝朝掃白雲

江行四首 曉

曉風搖五兩殘月映石壁稍稍曙光開片帆在空碧

晝

孤舟漾暖景獨鶴下秋空安流正日晝淨綠天無風

晚

古樹夕陽盡空江暮靄秋寂寞扣舷坐獨生千里愁

夜

猿聲到枕上愁夢紛難理寂寂深夜寒清霜落秋水

感南陽墓

枯荻沒古墓駸蘇蔽豐碑向晚微風起如聞坐嘯時

春日雪酬潘侍郎

酒杯春醉好飛雪晚庭閒久憶同前賞中秋對遠山

相思樹

家遠江東道身對江南春空見相思樹不見相思人

九日

重九共歡娛秋光景氣殊他時頭似雪還對插茱萸
中書送敕賜齋饌戲酬

常日每齊眉今朝共解頤遙知大官膳應與衆雛嬉

敕賜長壽酒

恩霑長壽酒歸遺同心人滿酌共君醉一杯千萬春

玉臺體十首

隱映羅衫薄輕盈玉腕圓相逢不肯語微笑畫屏前
知向遼東去由來幾許愁破顏君莫怪嬌小不禁羞

樓上吹簫罷閨中刺繡闌佳期不可見盡日淚潸潸
畫足珊瑚枕魂消玳瑁牀羅衣不忍著羞見繡鴛鴦
君去期花時花時君不至簷前雙燕飛落妾相思淚
空閨滅燭夜羅幌獨眠時淚盡腸欲斷心知人不知
秋風一夜至吹盡後庭花莫作經時別西鄰是宋家
獨自披衣坐更深月露寒隔簾腸欲斷爭敢下階看
昨夜裙帶解今朝蟄子飛鉛華不可棄莫是橐砧歸
萬里行人至深閨夜未眠雙眉燈下掃不待鏡臺前

江村夜歸

項斯

月落江村黑前邨人語稀
幾家深樹裏點火夜漁歸

送越僧

靜中無伴住今亦獨隨緣
昨夜離空室焚香淨去船

金井怨

曹鄴

西風吹急景美人照金井
不見面上花却恨井中影

庭草

庭草根自淺造化無遺功
低回一寸心不敢怨春風

怨詩二首

美人如新花許嫁還獨守豈無青銅鏡終日自疑醜
庭花已結子巖花猶弄色誰令生處遠用盡春風力

自退

寒女面如花空寂常對影況我不嫁容甘為餅墮井

早起

月墮滄浪西門開樹無影此時歸夢闌獨立梧桐井

思不見

但見出門踪不見出門跡却笑山頭女無端化為石

讀李斯傳

欺暗常不然欺明當自戮難將一人手掩得天下目

古莫買妾行

千扇不當路未似開一門若遣綠珠醜石家應尚存

雜識

帶香入鮑肆香氣同鮑魚未入猶可悟已入當何如

樂府體

蓮子房房嫩菖蒲葉葉齊共結池中根不厭池中泥

愁詩二首

遠夢如水急白髮如草新歸期待春至春至還送人
澗草短短青山月朗朗明此夜目不掩屋頭鳥啼聲

情詩三首

東西是長江南北是官道牛羊不戀山只戀山中草
阿嬌生漢宮西施住南國專房莫相妬各自有顏色
蛺蝶空中飛天桃庭中春見他夫婦好有女初嫁人

築城三首

郎有靡蕪心妾有芙蓉質不辭嫁與郎築城無休日
嗚嗚啄人鴉軋軋上城車力盡土不盡得歸亦無家
築人非築城圍秦豈圍戎不知城上土化作宮中火

甲第

遊人未入門花影出門前將軍來此住十里無荒田
望不來

見花憶郎面常願花色新為郎容貌好難好相似人

入關

衡門亦無路何況入西秦
灸病不得穴徒為采艾人

萬首唐人絕句卷十

欽定四庫全書

萬首唐人絕句卷十一

宋 洪邁 編

五言

春首

陳叔達

雪花聯玉樹冰彩散瑤池翔禽遙出沒積翠遠參差

初年

和風起 天露嚴氣銷冰井索索枝未柔厭厭漏猶永

欽定四庫全書

南行別弟

韋承慶

萬里人南去三春雁北飛不知何歲月得共爾同歸

曉發

賀知章

故鄉杳無際江皋聞曉鐘始見沙上鳥猶埋雲外峯

偶遊主人園

主人不相識偶坐為林泉莫漫愁酤酒囊中自有錢

王昭君三首

東方虬

漢道方全盛朝廷足武臣何須薄命妾辛苦事和親

拚涕辭丹鳳銜悲向白龍單于浪驚喜非復舊時容
邊地無花草春來不自春自然衣帶緩非是為腰身

題灞池

王昌齡

腰鎌欲何之東園刈秋韭世事不復論悲歌和樵叟

擊磬老人

雙峯褐衣久一磬白眉長誰識野人意徒看春草芳

題僧房

棕櫚花滿院苔蘚入閒房彼此名言絕空中聞異香

送郭司倉

映門淮水綠留騎主人
心明月隨良掾春潮夜
夜深

送李十五

怨別秦楚深江中秋雲
起天長杳無隔月影在
寒水

送胡大

荆門不堪別況乃瀟湘
秋何處遙望君江邊明
月樓

送張四

楓林已愁暮楚水復堪
悲別後冷山月清猿無
斷時

留別武陵田太守

按劍行千里，微軀感一言。
曾為大梁客，不負信陵恩。

武陵田太守席送司馬盧溪

諸侯分楚郡，飲餞五溪春。
山水清暉遠，俱憐一逐臣。

從軍行

大將軍出戰，白日暗榆關。
三面黃金甲，單于破膽還。

朝來曲

日昃鳴珂動，花連繡戶春。
盤龍玉臺鏡，唯待畫眉人。

送譚八之桂林

客心仍在楚江館復臨湘別意猿鳥外天寒桂水長

惜春

李益

畏老身今老逢春解惜春今年看花伴已少去年人

聽歌赤白桃李花

赤白桃李花先皇在時曲欲向西宮唱西宮宮樹綠

江南曲

嫁得瞿塘賈朝朝誤妾期早知潮有信嫁與弄潮兒

贈盧綸

世故中年別餘生此會同却將悲與病獨對朗陵翁

贈邢校書

俱從四方事共會九秋中斷蓬與落葉相值各因風

照鏡

衰鬢臨照鏡將看却自疑慚君明似月照我白如絲

路傍柳送人赴延州使府

路傍一枝柳此路向延州延州在何處此路起邊愁

書院無歷日問路侍御六月大小

野性迷堯歷松窗有道經故人為柱史為我數階莫

見亡人題壁

今日憶君處憶君君豈知空餘暗塵宇讀罷淚仍垂

軍次陽城烽舍北流泉

何地可潛然陽城烽樹邊今朝望鄉客不飲北流泉

天津橋南山中各題一句

野坐分苔石山行遠菊叢雲衣惹不破秋色望來空

荅竇二曹長留酒還榼

榼小非由榼星郎是酒星
解醒元有數不用嚇劉伶

聞雞

膠膠司晨鳴報爾東方旭
無事戀君軒今君重鳧鵲

石樓山見月

紫塞連年成黃沙
磧路窮故山今夜宿見月石樓中

荅宣供奉問蘭陵居

居北有朝路居南無住人
勞師問家第山色是南鄰

觀射騎

邊頭射雕將走馬出中軍遠見平原上翻身向暮雲

幽州

征戎在桑乾年年薊水寒殷勤驛西路此去向長安

聽箏

李端

鳴箏金粟柱素手玉房前欲得周郎顧時時誤拂絃

塞上曲

雁塞日初晴胡關雪復平危竿懸廣漠古竇傍長城

贈何兆

文章似楊馬風骨又清羸
江漢君猶在英靈信未衰

送人下第

獻策未得意馳車東出秦
暮年千里客落日萬家春

妾薄命

自從君棄妾憔悴不羞人
唯餘壞粉淚未免映衫勻

送僧遊春

獨將支遁去欲往戴顓家
晴野人臨水春山未發花

晦日遊曲江

晦日同攜手臨流一望春可憐
楊柳陌愁殺故鄉人

溪行逢雨與柳中庸

日落衆山昏蕭蕭暮雨繁
那堪兩處宿共聽一聲猿

和張尹憶東籬菊

傳書報劉尹何事憶陶家
若為籬邊菊山中有此花

秋日

反照入閭巷愁來與誰語
古道無人行秋風動禾黍

幽居作

山舍千年樹江亭萬里雲
回潮迎伍相驟雨送相君
題雲際寺故僧院

白髮怱怱色青山草草心
遠公仍下世從此別東林
觀鄰老栽松

雖過老人宅不解老人心
何事殘陽裏栽松欲待陰
贈胡居士

孔融過五十海內故人稀
相府恩猶在知君未拂衣

薦福寺送元偉

送客攀花後，尋僧坐竹時。
明朝莫回望，青草馬行遲。

哭苗垂

舊友無由見，孤墳草欲長。
月斜鄰笛盡，車馬出山陽。

客行贈人

旅行雖別路，日暮各思歸。
欲下今朝淚，知君亦溼衣。

蕪城

風吹城上樹，草沒城邊路。
城裏月明時，精靈自來去。

贈山老人

白首獨一身青山為四鄰
雖行故鄉陌不見故鄉人

拜新月

開簾見新月便即下階拜
細語人不聞北風吹裙帶

劍客

賈島

十年磨一劍霜刃未嘗試
今日把示君誰為不平事

宿懸泉驛

曉行漚水樓暮到懸泉驛
林月值雲遮山燈照愁寂

絕句二首

海底有明月圓於天上輪得之一寸光可買千里春
中夜忽自起汲此百尺泉林木含白露星斗在青天

詠韓氏二子

千巖一尺壑八月十五夕清露墮桂花白鳥舞虛碧

送別

丈夫未得意行行且低眉素琴彈復彈會有知音知

送客遊江湖

莫歎迢遞分何咫尺別江樓到夜登還見南臺月

對月

九日不出門十日見黃菊灼灼尚繁英美人無消息

寄令狐相公

策杖馳山驛逢人問梓州長江那可到行客替生愁

投李益

四十歸燕字千年外始吟已將書北岳不用比南金

雨中懷友人

對雨思君子
嘗茶近竹幽
儒家鄰古寺
不到又逢秋

寄遠

家住錦水上
身征遼海邊
十書九不到
一到忽經年

昆明池泛舟

一枝青竹榜
泛泛綠萍裏
不見釣魚人
漸入秋塘水

續古

陳陶

曾夢諸侯笑
康囚議脫枷
千根池裏藕
一朵火中花

續古二十六首

大堯登寶位麟鳳煥宸居海曲雷恩澤還生比目魚
生值揖遜歷長歌東南春釣鼇年三十未見天子巡
軒轅承化日羣鳳戲池臺大樸衰喪後仲尼生不來
大道歸孟門蕭蘭日爭長想得巢居時碧江應無浪
矻矻蓬舍下慕君麒麟閣笑殺王子喬寥天乘白鶴
杳杳巫峽雲悠悠漢江水愁殺幾少年春風相憶地
吳洲采芳客桂棹木蘭船日晚欲有寄徘徊春鳳前
仙家風景晏浮世年華速邂逅漢武時蟠桃海東熟

南國珊瑚樹好栽，天馬鞭魚龍不解語。海曲空蟬娟，
周穆恣遊幸，橫天驅八龍。寧知泰山下，日日望登封。
秦國饒羅網，中原絕麟鳳。萬乘巡海回，鮑魚空相送。
秦家無廟畧，備敵續長城。萬姓隴頭死，中原荆棘生。
秦作東海橋，中州鬼辛苦。縱得跨蓬萊，羣仙亦飛去。
隋煬棄中國，龍舟巡海涯。春風廣陵死，不見秦宮花。
范子相勾踐，滅吳成大勳。雖然五湖去，終媿磻溪雲。
麟鳳識翔蟄，聖賢明卷舒。哀哉嵇叔夜，智不及鷓鴣。

戰地三尺骨將軍一身貴自古若弔冤落花少於淚
楚國千里旱土龍日已多九穀竟枯死好雲間嵯峨
漢家三殿色恩澤若飄風今日黃金屋明朝長信宮
秦王卷衣貴本是倡家子金殿一承恩貂蟬滿鄉里
魏宮薛家女秀色傾三殿武帝鼎湖歸一身似秋扇
嬋娟越機裏織得雙棲鳳慰此殊世花金梭忽停弄
學古三十載猶依白雲居每覽班超傳令人慵讀書
雄劍久滯落夜吟秋風起不是嬾為龍此非延平水

欽定四庫全書

萬首唐人絕句
卷十一

十一

朝為楊柳色暮作芙蓉好春風若有情江山相逐老
景龍臨太極五鳳當庭舞誰信壁間梭升天作雲雨

永嘉贈別

芳草溫陽客歸心浙水西臨風清桂楫幾日白蘋溪

萬首唐人絕句卷十一

欽定四庫全書

萬首唐人絕句卷十二

宋 洪邁 編

五言

太平詞二首

王涯

風俗今和厚君王在穆清
行看採花曲盡是太階平
聖德超千古皇威靜四方
蒼生今息戰無事覺時長

遊春曲二首

萬樹江邊杏新開一夜風滿園深淺色照在綠波中
上苑何窮樹花開次第新香車與絲騎風靜亦生塵

送春詞

日日人空老年年春更歸相歡在尊酒不用惜花飛

塞上曲二首

天驕遠塞行出鞘寶刀鳴定是酬恩日今朝覺命輕
塞北常為敵邊風已報秋平生多志氣箭底覓封侯

從軍詞二首

於甲從軍久風雲識陣難今朝拜韓信計日斬成安
鷲領多奇相狼頭敢犯邊寄言班定遠正是立功年

隴上行

負劍到邊州鳴笳度隴頭雲黃知塞近草白見邊秋

閨人贈遠五首

花明綺陌春柳拂御溝新為報遼陽客流芳不待人
遠戍功名簿幽閨年貌傷妝成對春樹不語淚千行
啼鶯綠樹深語燕雕梁晚不省出門行沙場知近遠

形影一朝別煙波千里分君看望君處祇是起行雲
洞房今夜月如練復如霜為照離人恨亭臺到曉光

宮中樂五首

令狐楚

楚塞金陵靖巴山玉壘空萬方無一事端拱大明宮
雪霽長楊苑冰開太液池宮中行樂日天下盛明時
柳色煙相似梨花雪不如春風真有意一一麗皇居
月上宮花靜煙含苑樹深銀臺門已閉仙漏夜沈沈
九重青瑣闥百尺碧雲樓明月秋風起珠簾上玉鉤

遊春詞三首

曉遊臨碧殿日上望春亭芳樹羅仙仗青山展翠屏
一夜好風吹新花一萬枝風前調玉管花下簇金羈
閨闔春風起蓬萊雪水消相將折楊柳爭取最長條

遠別離二首

楊柳黃金穗梧桐碧玉枝春來消息斷早晚是歸期
玳織黃金履金裝翡翠簾畏人相借問不擬到城南

長相思二首

金文四庫全書
卷十二
君行登隴上
妾夢在閨中
玉筯千行落
銀牀一半空
幾度春眠覺
紗牕曉望迷
朦朧殘夢裏
獨自在遼西

從軍行五首

荒雞隔水啼
汗馬逐風嘶
終日隨征旆
何時罷鼓鼙
孤心眠夜雪
滿眼是秋沙
萬里猶防塞
三年不見家
卻望冰河闊
前登雪嶺高
征人幾多在
又擬戰臨洮
朔風千里驚
漢月五更明
縱有還家夢
猶聞出塞聲
暮雪連青海
陰霞覆白山
可憐班定遠
生入玉門關

思君思三首

小苑鶯歌歇長門蝶舞多
眼看春又去翠輦不曾過
雞鳴天漢曉鶯語禁林春
誰入巫山夢唯應洛水神
紫禁香如霧青天月似霜
雲韶何處奏只是在昭陽

王昭君

錦車天外去毳幕雲中開
魏闕蒼龍遠蕭關赤鴈哀
仙娥今下嫁驕子自同和
劔戟歸田盡牛羊繞塞多

聖明朝三首

張仲素

玉帛殊方至歌鐘比屋聞華夷今一貫同賀聖朝君
海浪恬丹徼邊塵靜黑山從今萬里外不復鎖蕭關
九陌祥煙合千春瑞月明宮花將苑柳先發鳳凰城

宮中樂五首

網戶交如綺紗窗薄似煙樂吹天上曲人是月中仙
翠匣開寒鏡珠釵挂步搖妝成祇畏曉更漏促春宵
紅果瑤池實金盤露井冰甘泉將避暑臺殿曉光凝
月采浮鸞殿砧聲隔鳳樓笙歌臨水檻紅燭乍迎秋

奇樹留寒翠神池結夕波
黃山一夜雪渭水瀉聲多

春遊曲三首

煙柳飛輕絮風榆落小錢
濛濛百花裏羅綺競鞦韆
騁望登香閣爭高下砌臺
林間踏青去席上寄牋來
行樂三春節林花百和香
當年重意氣先占鬪雞場

春閨思三首

雪盡萱抽葉風輕水變苔
玉闌書信絕又見發焦梅
裊裊城邊柳青青陌上桑
提籠忘采葉昨夜夢漁陽

戴勝飛晴野凌澌下濁河春風樓上望誰見淚痕多

春江曲三首

搖漾越江春相將采白蘋歸時不覺夜出浦月隨人
家寄征河岸征人幾歲游不如潮水信每日到沙頭
東曉南湖去參差疊浪橫前洲在何處霜裏鴈嚶嚶

晚日湖上寄所思

李華

與君為近別不啻遠相思落日平湖上看山對此時

寄從弟

眼病身亦病浮生已半空迢迢千里月應與惠連同

奉寄彭城公

公子三千客人人願報恩應憐抱關者貧病老夷門

詠項羽

于季子

北伐雖全趙東歸不王秦空歌拔山力羞作渡江人

慈恩寺殘春

耿漳

雙林花已盡葉色占殘芳若問同游客高年最斷腸

秋夜

高秋夜分後遠客鴈來時寂寂重門掩無人問所思

早行

匹馬曉路歸悠悠渭川道晴山向孤城秋日滿白草

左掖梨花

丘為

冷艷全欺雪餘香乍入衣春風渾不定吹向玉階飛

奉酬韋應物

丘丹

露滴梧葉鳴風秋桂花發中有學仙侶吹簫弄山月

又酬贈

久作煙霞侶暫將簪組親
還同褚伯玉入館忝州人

聽江笛送陸侍御

離樽聞夜笛寥亮入寒城
月落車馬徹悽惻主人情

靜夜相思

李羣玉

山空天籟寂水榭延輕涼
浪定一浦月藕花閒自香

桂州經佳人故居

桂水依舊綠佳人本不還
祇應隨暮雨飛入九疑山

放魚

早覓為龍去江湖莫漫游須知香餌下觸口是銛鉤

蓮葉

根是泥中玉心承露下珠在君塘下種埋沒任春蒲

客愁二首

客愁看柳色日日逐春深蕩漾春風起誰知歷亂心
客愁看柳色日日逐春長憑送湘流水綿綿入帝鄉

洞庭乾二首

借問蓬萊水誰逢清淺年傷心雲夢澤歲歲作桑田

朱宮紫貝闕一旦作沙洲八月還平在魚蝦不用愁
病起別主人

益愧千金少情將一飯殊恨無泉客淚盡泣感恩珠
火爐前坐

孤燈照不寐風雨滿西林多少關心事書灰到夜深

古詞

一合相思淚臨江灑素秋碧波如會意却與向西流

嘲賣藥翁

斲盡春山土，辛勤賣藥翁。
莫拋破笠子，留作敗天公。

傷小女

哭爾春日短，支頤長歎嗟。
不如半死樹，猶吐一枝花。

青鷁

獨立蒹葭雨，低飛浦嶼風。
須知毛色下，莫入鷺鷥叢。

池塘晚景

風荷珠露傾，驚起睡鷓鴣。
月落池塘靜，金刀剪一聲。

投從叔

可惜出羣蹄毛焦久卧泥孫陽如不顧騏驥向誰嘶
惱自澄

常聞天女會玉指散天花莫遣春風裏紅芳點架
讀賈誼傳

卑濕長沙地空拋出世才已齊生死理服鳥莫為災
寄人

寄語雙蓮子須知用意深莫嫌一點苦便擬棄蓮心

寄韋秀才

荆臺蘭渚客寥落共含情空館相思夜孤燈照雨聲

春日寄友

晴氣熏櫻藥丰濛雪滿林請君三斗酒醉卧白羅岑

題竹

一頃含秋綠森風十萬竿氣吹朱夏轉聲掃碧霄寒

懷初公

不見休上人空傷碧雲思何處開寶書秋風海光寺

龍安寺佳人阿最歌八首

團團明月面冉冉柳枝腰未入鴛鴦被心長似火燒
見面知何益聞名憶轉深拳攀荷葉子未得展蓮心
欲摘不得摘如看波上花若教親玉樹情願作蒹葭
門路穿茶焙房門映竹煙會須隨鹿女乞火到窻前
不是求心印都緣愛綠珠何須同泰寺然後始為奴
既為金界客任改淨人名顏掃琉璃地燒香過一生
素腕撩金索輕紅約翠紗不如攔下水終日見桃花
第一龍宮女相憐是阿誰好魚輸獺盡白鷺鎮長飢

送人入金華

嚴維

明月雙溪水清風八詠樓少年為客處今日送君遊

城隍廟賽雨二首

羊士諤

零雨慰斯人齋心薦綠蘋山風簫鼓響如祭敬亭神
積潤通千里推誠奠一卮回飆經畫壁忽似偃雲旗

初移琪樹

愛此丘中物煙霜盡日看無窮白雲意更助綠牕寒

萬首唐人絕句卷十二